

Borom gwnangkuk Metropolitan wngwi Khristmasni Kok

December 2024

Kwthamsa Kaitor, Pha Sajla tei Phola Kwtharni chwngsacha tei borom tabuk tei molbrum tongthung. Amen.

Ao, ang chengna swkang, ang sanai tongthok Khristmas tei tongthok Bisi Kwtalni bu kha kaham yapharo. Haino hai Khristmas phaiphio kha. Bisi brumno December talo hwnkhe swngchar gwnangwi bororok Khristmas terno palaina bagwi uansuklaio tei tiyar wnglaio. Phiyaba ang o kisa salrogo Khristmas tamo? abono twiui uansugwi tongmani. Sabono chwng palaima klai? Tamono chwng palaima klai? Tai tamoni bagwi chwng palailai?

Chwng khoroksa chwrai achaimano se palaima klaio je chwrai musuk ada chama jagao rokojak. Khoroksa absakwlwi. Tamoni bagwi ba swngchar gwnangwi o chwraini kok sajak kha tei palaima klai kha? Abose uansukjaknai kok bokhiri.

Ao, chwng jotono Jisuno Emmanuel, Kaitor chwngbai tongo, Phiyoknaisa, soidom chwrai hwnlaio. Tei chwng musuk ada chama manwini kok sao, Joseph tei Ama Mariamni kok sao. Chwng elemi khorokthamni kok sao. Chwng nokhani athukirini kok sao. Suari rwchapma kok. Kwbangma kok abohai kokbothoma no salaio. Phiyaba aro bu chwrai rokojak hwnkhe belai tongkusu chwrai.

Chwng tabuk je kokno pirwi tonglaio abono twi tamo uansuk, je wngmani wngkha abo 2000 bisi swkang wngmani kokno da pirlai tongma klai? Kaitor borokni mang wngwi achai phai kha, khoroksa absakwlwi chwraini mang, bose Mwthangnaisa, phiyoknaisa wngwi achai kha. Phiyaba ang kha khlaio chwng je o palaimani Kaitor chwngno tamo uansukrwana nai hwnkhe, a chwraini kok, uanamasingcha a chwraini kok, a chwraini judakuk tongmungni kok.

Tamo a chwraini judakuk tongmungrok? Koinene, poito, bwkha rwma, kwchang kwchang, tektono manjaknani kiriya, bwkha kubui tei sumsok kwrwi kwthar chwrai. Tei mungsa kirima kwrwi khe, chini Subrai Jisu Bo sakbaithangno phwrwng kha, kokpir kha, hamyano hamrwkha tei abohai keno samung kaham khlaikha tei aphuru Bo hai hwnwi sakha, " naidi norok o chwrai hai wngdi, hakhe chuknahao thai man anw. "

Hakhe, o Khristmas jorao ang norokno kok thaisa swngnai, chwng palaina thangwi tongo khwnathok khwnathok rwchapmung bai, Carol rwchapmung bai, jilik jalak chati sajakma bai, motha nok tei nokno sajakma bai, giftrok rwma bai tei cake rok rama bai, norok kisa omono twiui uansugwi naidi tamoni bagwi chwng omohai khlai? Ani abohai judakuk tongmung da tong?

Tabuk chini o swngcharno naisigwi naidi, chini bororokno. Chwng nugo nok baijak, nukhung chukya nukhungrok. Tamoni bagwi hairok tong? Tamoni hwnkhe aro hamjakma kwrwi, khairoklaima kwrwi, maya chama kwrwi, nakarlaima kwrwi. Bororok nukhung kaisa ono tonglaio haiphano aro mecherbung, jolimung, tongkwchang kwrwi, khabaksa kwrwi. Chwng a judakuk tongmungrokno manna muchungya da?

Chwng belai hohom dodo, belai borok kwbangma kuthumlaijak, belai naithok, bororok naithok naithok ri chumlaijak khe o terno palai phano, nwnng saichung hai, hamjakma kwrwi hai, nakarma kwrwi hai, saksai chung hai tei nukhung baijak hai ma tongya da? Ma, pha, takhuk, bukhuk nukhungo hamjagwi thansa khe tongwi manya. Hake abohai khe tongwi da o Khristmas terno palaina bagwi Kaitor chwngno sama klai eba khe o chwraino twiui tongthoklainani se, hake chwng taibu hamjaklai mannani, taibu tongthoklai mannani, taibu

khakchanglai mannani, nakarlai mannani, maya chalai mannani tei omohai khe o swngcharo tongkwchang tongmung bai khe tongwi mannani. Abo chwng nukhung chikonsao phano abohai khe tongwi mano.

Jisu achaimani a chikonte aulikhorno twiui uansugwi naidi. Kwthar elembago hai hwnwi sao, Jisu Nazareth o se achai. Hake nini nokbu kaisa Nazareth khlaida mano? Nini nukhungni borokno bu kaisa Nazareth ni nukhung khlaida mano? Nini sak langma no bu Nazareth ni khlaida mano? Nini motha tei parishno bu kaisa Nazareth ni motha khlaida mano? Je Nazaretho Jisu achai aroni no da nwnng wngwi man? Hake nwnng jotono Kothoma Kahamno saklaima tei pirma klaio.

Hake tabuk Ama Mariamno twiui uansugwi naidi. Ang khoroksa lamao tongnai chwraini kothomano pori kha. Phiyaba a chwrai Sisters of Mothers of Charity' song bai twlangj

twlangjak kha St. Mother Teresa ni chwrairok tongma nok Calcutta o. Bororok a chwraino twlangwi kaham khe tukurwkha, ri rok sui rw kha, kaham chamung rw kha, thunani thai rw kha tei kaham khe naikol kha. Phiyaba bo aroni kharwi thang kha. Hake kebo hainohai lamao manphirwi sister rokni thani yapaharwi rohor phi kha. Bohrok bono twi tuku rwphi kha, rirok sui rwkha tei omono nini nok hwnwi sa kha. Mother Teresa bini sister rokno hai hwnwi sakha, norok tamo khlainai saida man, tumungno o chwrai tai uaisa kharwi thangkhe, bono rwktharwi naidi buro bo thang tei tamo khlai. Tai haino hai o chwrai uaitham kharwi thangphi kha. Tei sister rok bono rwktharlai kha. Bohrok o chwraino rwktharwi naiba o chwrai khoroksa bwrwichuk buphang tolao thapa swnamjak o mui songwi tongma nukha. Nwnng saimano a thapa bahai khe swnamjak hwn khe koto koto kaisa holong beraui swnamjak tei arono mai songwi tongkha. Tei o chwrai a buma bwrwichwknii samo thangwi achugwi kha. Hake sister rok thangwi phaidi phaidi hwnwi sakha. O chwrai tamo sakha hwnkhe omono ani nok, ani ama bu orono tongo. Tei ani chamung bu orono.

Hake Ama Mariamni kok uansugwi nailai anw. Bo o chwraino achai rwkha. Belai lachimung rwjak kha, hamya sajak kha tei o chwraino tor rwna bagwi bebakno soikha. Boni bagwi chwngbu o Khristmas jorao o Ama Mariam hai wngwi da man? Buino chamung rwnai, tongthai rwnai, ani thaino buino rwi mannai. Abo a chwrai sama hai, " omono ani nok, tamoni hwnkhe ani ama oro tongo. Ani chamung orono."

Ang khatungo tei surio je chwng o uansukmungrokno twiui uansuknani tei Jisu Khristo achai phaimani kokno twiui kubui khe palainani. Khoroksa tai khoroksano hamjaklainani. Khoroksa tai khoroksano kwthalai tongnani. Khoroksa tai khoroksano nakarlai tongnani. Norok aswkno omohai khlaidi aswkno chwng nukhung, hoda tei hayung hakotorno tongkwchang tonma klainai tei bororok pal baksa kwthai tongma klainai, khoroksa tai khoroksano tialaima klainai tei thinangni kaham khlaima klainai.

Ang norok jotoni bagwi suriui tongo tei jotono tongthok Khristmas tei tongthok Bisi Kwtalni kha kaham yapharo. Hake Phan gwnang Kaitor, chini bagwi Mwthaghnaisa Jisuno rwnai, hai hwnwi sao, " Kaitor swngcharno aswk khe hamjakma bai se Bo chwngno Bini Sajlano rwkha." Hake o Jisun baino kwrwngwi tonglai anw tei o Khristmas jorao tei Bisi kwtao tongthokma tei khakchangma norokni langmao tongthung. Amen.+

Kwthar Mothani samungo

Khristo o norokni Pha

Moron Mor Samuel Theophilus Metropolitan